



Број/Број: **01/2,03/11-05-1-99/12**

Сарајево/Sarajevo: 25.05.2012.

## KOLEGIJIMA OBA DOMA PARLAMENTARNE SKUPŠTINE BIH

### ČLANOVIMA KOMISIJE ZA VANJSKE POSLOVE PREDSTAVNIČKOG DOMA

### ČLANOVIMA KOMISIJE ZA VANJSKU I TRGOVINSKU POLITIKU, CARINE, SAOBRAĆAJ I KOMUNIKACIJE DOMA NARODA

## IZVJEŠTAJ

### o posjeti Komisije za vanjske poslove Predstavničkog doma Parlamentarne skupštine Bosne i Hercegovine Republici Hrvatskoj, 21.maj 2012.godine

Na poziv predsjednika Odbora za vanjsku politiku Hrvatskog sabora, **Milorada Pupovca**, u zvaničnoj posjeti Zagrebu je 21. maja 2012.godine boravila delegacija Komisije za vanjske poslove Predstavničkog doma Parlamentarne skupštine Bosne i Hercegovine koju su sačinjavali: **Mirza Kušljugić**, predsjedavajući Komisije, **Zvonko Jurišić**, drugi zamjenik predsjedavajućeg, te članovi Komisije **Milica Marković** i **Mladen Ivanković-Lijanović**, kao i **Merdžana Iglica**, sekretar Komisije.

U pratnji delegacije su na brojnim sastancima bili **Nj.E. Vladimir Raspudić**, ambasador BiH u R Hrvatskoj, **Sanela Papa-Avdić**, prvi sekretar u Ambasadi te **Esad Suljić**, savjetnik u Ambasadi.

U okviru ove jednodnevne radne posjete Zagrebu, program pripremljen za delegaciju je bio veoma sadržajan, sveobuhvatan, raznovrstan i višestruko koristan. Naime, pored serije veoma plodonosnih sastanaka sa članovima Hrvatskog sabora, delegacija je susrela i predstavnike izvršne vlasti, tj. predstavnike Vlade R Hrvatske i Ministarstva vanjskih poslova i evropskih integracija.

Zvanični susreti su započeli u Ministarstvu vanjskih poslova i evropskih integracija R Hrvatske, gdje se delegacija Komisije susrela sa **Davorom Vidišem**, ambasadorom, pomoćnikom ministrice i donedavnim ravnateljem Uprave za susjedne zemlje i Jugoistočnu Evropu. G. Kušljugić je u ime delegacije Komisije za vanjske poslove najprije čestitao g. Vidišu na novoj ambadorskoj poziciji koja će biti upravo u BiH i zahvalio za dosadašnji angažman R Hrvatske na euroatlantskom putu BiH. Također je pozdravio aktivnosti na

organiziranju dvodnevne konferencije u Zagrebu u sklopu Igmanske inicijative u junu 2012.godine.

G. Vidiš je izrazio zadovoljstvo posjetom delegacije Komisije za vanjske poslove i naglasio da bi saradnja na nivou parlamenata trebala biti intenzivirana, posebno u trenutku u kome se Hrvatska nalazi pred vratima EU, a BiH treba što prije aplicirati za kandidatski status. Između dvije države se treba prenositi znanje, ali na jedan partnerski, a ne tutorijalan način, naglasio je Vidiš. U tom smislu je upoznao goste o Sporazumu o tzv. Euroatlantskom partnerstvu koji je ministrica **Vesna Pusić** predala svom bosanskohercegovačkom kolegi **Zlatku Lagumdžiji** prilikom njegove posjete Zagrebu. Napomenuo je da R Hrvatska želi promijeniti filozofiju vanjske politike u cijeloj regiji u smislu da se vodi intenzivni dijalog, u ovom slučaju između RH i BiH, pa se onda zajednički nastupa prema Evropskoj komisiji, a ne da se događa obratno, tj. da EK vodi dijalog pojedinačno sa zemljama u regiji. Na izraženo zadovoljstvo članova Komisije za vanjske poslove skorim ulaskom RH u EU, te beneficijama od toga za BiH, naglašena je potreba sagledavanja i pripreme za negativne posljedice ove situacije. Također je rečeno da uprkos dobrim odnosima između dvije zemlje, postoji još niz otvorenih pitanja koje treba rješavati što prije, i u tom smislu, zbog već dužeg nefunkcionisanja međudržavnog vijeća između RH i BiH, pod hitno treba napraviti operativno tijelo između dviju vlada koje bi radilo na rješavanju svih spornih pitanja i bilo fokusirano na doseganje EU standarda od strane BiH. U tom kontekstu, zaključak je obiju sagovornika, treba depolitizirati sva tehnička pitanja vezana uz EU integracije, pokazati fleksibilnost na obje strane i imati doista intenzivnu komunikaciju na razini ovog operativnog tijela.

Naredni sastanak je bio prvi u nizu sastanaka u Hrvatskom saboru, i to sa njegovim predsjednikom, **Borisom Špremom**. Osim o bilateralnim odnosima, koji su ocijenjeni dobrosusjedskim, prijateljskim i partnerskim, razgovaralo se o potrebi sveobuhvatne izmjene Ustava i izbornog zakonodavstva u BiH te o pristupanju BiH NATO-u i Evropskoj uniji. Potvrđena je spremnost Hrvatske da savjetima i prijenosom vlastitih iskustava i znanja pomogne BiH u procesu približavanja EU i NATO-u. Predsjednik Sabora Boris Šprem istakao je da sadašnji politički i institucionalni sistem BiH nije uspio zajamčiti jednaku zastupljenost i ravnopravnost svih triju naroda u BiH, a ključ rješenja vidi u postizanju ravnoteže između etničke i građanske zastupljenosti, jačanju bosanskohercegovačkih institucija te ostvarivanju stvarne ravnopravnosti svih triju konstitutivnih naroda u BiH. G.Šprem je također naglasio značaj Sporazuma o euroatlantskom partnerstvu dvije zemlje i u tom kontekstu osnivanje Centra za euro-atlantske strategije sa sjedištem u Mostaru.

Predsjedavajući Komisije za vanjske poslove Predstavničkog doma Parlamentarne skupštine BiH Mirza Kušljugić saglasio se s potrebom izmjene Ustava i izbornog zakonodavstva BiH, iako nema iluzija da će to biti uskoro. Kazao je kako Komisija za vanjske poslove želi konkretnu saradnju sa saborskim odborima za vanjske poslove i evropske integracije, "ne samo u rješavanju problema iz prošlosti nego i u suočavanju s izazovima budućnosti", a sve radi unaprijeđenja ekonomskih i svih drugih dobrosusjedskih odnosa. Članovi delegacije Komisije za vanjske poslove istakli su važnost hrvatske podrške i pomoći u evropskim i evroatlantskim integracijama BiH te su izrazili želju da se prije ulaska Hrvatske u EU riješe sva konkretna pitanja između dviju zemalja radi nastavka i poboljšanja saradnje, posebno

parlamentarne i u tom smislu su izrazili želju da u što skorijem periodu vide g.Šprema u Sarajevu.

Potom je uslijedio sastanak sa čelnicima Odbora za Hrvate izvan Hrvatske u Hrvatskom saboru. U uvodnom dijelu sastanka potpredsjednik Odbora za Hrvate izvan Republike Hrvatske **Ivo Jelušić** izvijestio je goste iz Bosne i Hercegovine o aktivnostima i radu Odbora koji je jedan od 29 stalnih saborskih odbora i u kojem predsjedničko mjesto pripada opoziciji (Ivan Šuker). G. Jelušić je istakao da je Hrvatski sabor prošle godine donio Zakon o odnosima Republike Hrvatske s Hrvatima izvan RH te je u skladu s tim Zakonom formalno konstituiran Ured za Hrvate izvan Republike Hrvatske koji, međutim, još nije započeo s radom. Sagovornici su u nastavku razgovarali o saradnji dviju zemalja, posebice u kontekstu „evropske perspektive“ Bosne i Hercegovine. Geografska, kulturna i ekonomska povezanost dviju zemalja predstavlja odličan temelj za saradnju na područjima energetike i prometne infrastrukture, ocijenili su sagovornici. Nakon što je g. Jelušić Hrvate izvan Hrvatske svrstao u tri kategorije: 1. klasična dijaspora (ili tzv. ekonomska emigracija), 2. nacionalne manjine u susjednim zemljama i 3. Hrvati u BiH, sagovornici su razmijenili mišljenja o položaju Hrvata u BiH, a g. Jelušić je naglasio da je Hrvatska posebno zainteresirana za položaj Hrvata, ali i za položaj svih drugih u BiH. U interesu je Republike Hrvatske da Bosna i Hercegovina bude politički i ekonomski snažna i stabilna, kazao je g. Jelušić. Bilo je riječi i o ukupnoj političkoj situaciji u Bosni i Hercegovini, a sastanak je zaključen dogovorom o budućoj saradnji.

Nakon ovoga je uslijedio sastanak sa domaćinom ove službene posjete Zagrebu, Odborom za vanjsku politiku Hrvatskog sabora, na čelu sa njegovim predsjednikom **Miloradom Pupovcem** (SDSS-Samostalna demokratska srpska stranka) i članovima Odbora **Davorom Ivom Stierom** (HDZ-Hrvatska demokratska zajednica), **Igorom Dragovanom** (SDP-Socijaldemokratska partija) te **Igorom Kolmanom** (HNS-Hrvatska narodna stranka-liberalni demokrati).

G. Pupovac je na početku razgovora izrazio iznimno zadovoljstvo što je delegacija Komisije za vanjske poslove Predstavničkog doma PSBiH u posjeti Hrvatskom saboru i što se u ovoj sadržajnoj i radnoj posjeti mogu razmijeniti mišljenja i ideje, kao i iskustva o stvarima koje su od obostranog interesa za RH i BiH. I to zato što Bosna i Hercegovina Hrvatskoj nije zemlja kao svaka druga i po mnogo čemu joj je bliža od drugih zemalja. To je susjed s kojim Hrvatska ima najdužu granicu i susjed s kojim Hrvatska ima niz zajedničkih spona, ljudskih, ekonomskih, političkih i svakih drugih, naglasio je g. Pupovac. Bosna i Hercegovina je u tom smislu nukleus, srce regije i u tom smislu RH Bosnu i Hercegovinu razumije kao mjesto gdje se isprepliću interesi koji su vitalni za Hrvatsku u pravom smislu te riječi. Zato je za RH od posebne važnosti dalji proces političke i ekonomske stabilizacije Bosne i Hercegovine, i nalaženje potencijala da se i u Bosni i Hercegovini stvore pretpostavke za ekonomsku stabilnost i za ekonomski razvoj, riječi su g. Pupovca.

Zahvaljujući na pozivu i gostoprimstvu, predsjedavajući Komisije za vanjske poslove Mirza Kušljugić je naglasio da je ovo prva zvanična posjeta u funkciji Komisije za vanjske poslove Predstavničkog doma PSBiH i da je jako dobro što je to upravo posjeta Hrvatskom saboru. Uzvratio je da ni Hrvatska nije obična zemlja za Bosnu i Hercegovinu i predstavlja zajedno sa Srbijom i Crnom Gorom u užem smislu najvažniji prioritet vanjske politike Bosne i Hercegovine. Naglasio je da je namjera da svi ovi parlamenti, konkretno putem

vanjskopolitičkih odbora, pokušaju unaprijediti taj oblik saradnje prije svega na tri sektora: to su najprije iskustva koja BiH može i treba podijeliti s Hrvatskom vezano za evroatlanske integracije. Drugo je vezano za unaprijeđenje općenito saradnje u regionu i preko nekih inovativnih rješenja i treće, najvažnije, je rješavanje konkretnih problema koji su vezani za ekonomski oporavak jedne i druge ekonomije. Kada je riječ o nekim inovativnim i drugim oblicima saradnje između komisija parlamenata, potrebno je češće i intenzivnije sastajanje kako bi se ubrzalo rješavanje konkretnih problema, prema prioritetima i tu je bitno da se parlamenti uključe kako bi ono što se dogovori i potpiše bude ratificirano u Saboru i u Parlamentarnoj skupštini BiH, istakao je g. Kušljugić.

Što se same hrvatske vanjske politike tiče, istakao je g. Pupovac, ona je ovoga trenutka usmjerena u tri smjera. Prvi je završetak evropskog procesa RH, s jedne strane ratifikacije hrvatskog pristupnog ugovora EU, a s druge strane ispunjavanje obaveza koje su definirane monitoringom od strane EU. Drugi smjer je nastaviti voditi računa o komponenti koja se tiče odnosa prema drugim zemljama, prije svega prema Ruskoj Federaciji, Kini i prema trećim zemljama u svijetu sa kojima RH mogu povezivati bilo ekonomski, bilo energetska, bilo neki treći interesi. I tom smislu je u proteklih nekoliko mjeseci zabilježena značajna aktivnost i sa hrvatske strane i strane predstavnika spomenutih zemalja. I treći smjer je, naravno, regionalna saradnja. Za RH je regija od velike važnosti kao i proces približavanja EU tj. članstvo u EU, i to iz dva razloga: prvi je što Hrvatska ima posebnu odgovornost unutar EU kao zemlja koja treba doprinijeti stabilizaciji u regiji i u daljem procesu širenja EU i završetku toga procesa na Balkanu, a drugi je što RH ima svoje sasvim određene nacionalne i ekonomske interese u regiji. S tim u vezi, RH smatra da je neophodno da se dočelno državno povjerenstvo koje bi se formiralo pozabavi listom otvorenih pitanja koja postoje u međusobnim odnosima i u kojim bi se definirali s jedne strane rokovi, a s druge strane načini kako bi se pristupilo rješavanju tih otvorenih pitanja. I za RH i za BiH bilo bi dobro kada bi se neka od tih pitanja riješila prije ulaska Hrvatske u EU, dakle prije 1.7.2013 godine, ocjena je g. Pupovca. Jedno od takvih pitanja su i posljedice izlaska Hrvatske iz CEFTE.

Što se tiče odluke Evropskog suda za ljudska prava u slučaju Sejdić-Finci koja implicira provedbu sveobuhvatne reforme i izbornog zakonodavstva u Bosni i Hercegovini g. Pupovac je zamolio svoje sagovornike da razumiju da RH ima svoje interese u vezi sa zastupljenošću pripadnika hrvatskog naroda na prostoru BiH te da je neophodno da se u tom smislu iznađu rješenja koja će jamčiti bolji osjećaj i bolju funkcionalnu poziciju Hrvatima u BiH.

Osvrćući se na ekonomska saradnju RH i BiH, predsjednik vanjskopolitičkog odbora Hrvatskog sabora je naglasio da je vrijeme da se otvori prostor i za neku formu međudržavne saradnje i međudržavnih projekata. Najznačajniji programi koji se tiču projekata su infrastrukturni kao što je Koridor Vc, Jadransko-jonska cesta kroz Neum, energetska saradnja, te turistički razvoj pograničnih regija, kako je potpredsjednica Vlade RH i ministrica vanjskih poslova Vesna Pusić u svojem programu na posebnom mjestu istakla i nazvala tzv. „hrvatskom Provansom“ u koju ulazi zapadna Hercegovina, dio Dalmacije, tj. njeno zaleđe, područje oko velike Cetine i prema Obrovcu, pa dalje prema Krki, dakle odnosi se na regiju od zadarskog zaleđa do Konavala, odnosno na Dalmatinsku zagoru.

Što se tiče suradnje između parlamenata, posebno vanjskopolitičkih odbora g. Pupovac je naglasio da i u jednom i u drugom segmentu, u prvom kada je u pitanju evropska perspektiva i evroatlansko partnerstvo, a i u drugom kada je po sredi mješovito povjerenstvo za rješavanje preostalih osnovnih pitanja, ova dva odbora mogu značajno tomu doprinjeti. U tom kontekstu je goste izvijestio da su već predložili kolegama u regiji, u Sloveniji, u Crnoj Gori i Makedoniji, danas i BiH, a uskoro će predložiti kolegama iz Srbije, nakon toga kolegama s Kosova, da se formira neka vrsta regionalne konferencije, saradnje, neka vrsta redovitoga sastajanja i praćenja situacije između odbora za vanjsku politiku u regiji. Također je izrazio želju da u tom tijelu ne budu samo zemlje sa prostora bivše Jugoslavije, nego i neke zemlje Mediterana i Srednje Evrope, pa i neke zemlje tzv. donjeg Balkana po uzoru na COFACC, dakle na Konferenciju Odbora za vanjsku politiku zemalja članica EU i zemalja kandidatkinja za EU. I u tom smislu je iznesen prijedlog da se prvo okupljanje te vrste dogodi u Zagrebu na jesen i da se tu utvrdi neka agenda, dnevni red koji bi onda mogao biti predmet zajedničkog angažmana i zajedničkog interesa.

Iznesen je prijedlog da se BiH i RH mogu dogovoriti da ovi susreti imaju i tematski karakter, kako bi se pokazalo građanima dviju država da se može stvoriti jedna vrsta radnoga stanja u međusobnim odnosima i da postoji jedan kontinuitet u tom pogledu.

Odgovarajući na ove prijedloge, g. Kušljugić je zahvalio i u ime Komisije za vanjske poslove veoma rado prihvatio ovu inicijativu te rekao da je ideja tematskih sjednica jako dobra i konstruktivna. Dodao je da ne bi bilo loše da se to temeljito priprema te da se pozovu na sastanke stručnjaci i ljudi koji su učestvovali u vašim pregovorima oko Acquisa u određenim oblastima i tu izaberu teme koje su od zajedničkog interesa. Sigurno je to transportna infrastruktura, zaštita okoline, energetika, turizam, poljoprivreda, prekogranična saradnja nižih nivoa vlasti, mišljenja je g. Kušljugić. Zajednički cilj bi trebao biti što efikasnije korištenje i predpristupnih fondova i strukturnih fondova EU.

Razgovor sa izaslanstvom Odbora za vanjsku politiku Hrvatskog sabora, g. Kušljugić je završio sa japanskom izrekom koja kaže da je vizija bez strategije san koji se sanja po danu, a da je strategija bez vizije, kao što je to nažalost to bio slučaj do sada, ustvari noćna mora. Tu noćnu moru se može i mora izbjeći upravo zajedničkom vizijom koja će biti realizirana osmišljenom i mudrom strategijom na dobrobit svih.

Nakon radnog ručka čiji je domaćin bio predstavnik bošnjačke manjine u Hrvatskom saboru, **Nedžad Hodžić**, delegacija Komisije za vanjske poslove sastala se s predsjednikom Odbora za evropske integracije Hrvatskog sabora, **Danielom Mondekarom** i članovima Odbora **Melitom Mulić**, **Davorom Ivom Stierom** i **Gvozdenom Srećkom Flegom**. Sagovornici su uvodno izrazili želju za daljnjim jačanjem saradnje, posebno u kontekstu prijenosa hrvatskih iskustava iz pristupnih pregovora. Daniel Mondekar podsjetio je da je Hrvatska prošla potpuno novi model pregovora za pristupanje EU. Pozitivne strane tog modela, naglasio je, brže su provođenje reformi i puno veća spremnost čitavog društva za funkcioniranje unutar EU. U predstojećem razdoblju prioritet je Hrvatske priprema za sljedeći izvještaj o monitoringu i zaključenje procesa ratifikacije u predviđenom roku. Upoznao je goste s

pripremanima ovog radnog tijela, ali i drugih, te stručne službe Hrvatskoga sabora za novi djelokrug i način rada kao parlamenta zemlje članice EU. U tom smislu u pripremi je i zakonodavni okvir koji će urediti nove odnose Vlade i Sabora, a potrebno je provesti i niz administrativnih reformi radi jačanja tehničkih i ljudskih kapaciteta Hrvatskoga sabora, zaključio je. Najavio je i da će se, umjesto dosadašnjeg, novouspostavljeni Odbor za evropske poslove i zvanično formirati u Hrvatskom saboru najvjerojatnije do jeseni. Predsjedavajući Komisije za vanjske poslove Predstavničkog doma Parlamentarne skupštine BiH Mirza Kušljugić rekao je da Hrvatska i BiH ulaze u novu fazu saradnje te da je ovo prilika za unaprijeđenje odnosa. U tom kontekstu obostrano je pozdravljena inicijativa za uspostavljanje kontinuirane saradnje vanjskopolitičkih odbora parlamenata regije.

Posljednji radni sastanak delegacije Komisije za vanjske poslove u okviru službene posjete Zagrebu bio je sa potpredsjednikom Vlade za unutarnju, vanjsku i evropsku politiku **Nevenom Mimicom**. Sagovornici su izrazili zadovoljstvo dobrosusjedskim i prijateljskim odnosima Republike Hrvatske i Bosne i Hercegovine, kao i uvjerenje u njihov daljnji razvoj i jačanje u svim područjima od zajedničkog interesa za obje zemlje, a njih je doista puno. Uz napomenu da je Bosna i Hercegovina najvažniji susjed Republici Hrvatskoj, te da sadašnja Vlada lijevog centra nastupa sa državnog stanovišta, a ne bilo kakvih stranačkih interesa, G. Mimica je ponovio punu podršku suverenitetu i teritorijalnom integritetu Bosne i Hercegovine, kao i jednakopravnosti svih triju njenih konstitutivnih naroda. Naglasio je spremnost Republike Hrvatske da prijenosom iskustava iz procesa pristupanja Evropskoj uniji i NATO-u pruži punu podršku Bosni i Hercegovini na njenom evroatlantskom putu. Obostrano je potvrđena želja za nastavkom sveukupne saradnje dviju zemalja i u regionalnom kontekstu, a s ciljem postizanja trajne stabilnosti jugoistočne Europe.

Izvještaj sačinila:

Merdžana Iglica, sekretar Komisije za vanjske poslove Predstavničkog doma PSBiH

Dostavljeno:

- Naslovu
- Ministarstvu vanjskih poslova BiH
- Sektoru za međunarodne odnose i protokol
- a/a